

Errugbia ♦ Getxo Arteak Oviedo hartuko du bihar; eta biak maila galtzeko arriskuan daude

Galtzea, arrisku larria

Joanekoan Oviedo gailendu zen, baina Getxo mentalizatuta dago

Koldo Alduntzin / Donostia

EGOERA gaiztoan murgilduta dihardu Getxo Arteak. Sailkapeneko azken postuan da, eta maila galtzeko arrisku bizian. Bi aukera izango ditu egoera pozoitu horretatik irteteko, biharkoa Oviedoren kontrakoa eta heldu den larunbatekoa, Generaliferen kontra, Granadan. Nolanahi ere, bi partidak irabazi behar ditu. Gogoratu behar da azken hiru sailkatuek galduko dutela maila, heldu den denboraldian 10 talde ariko baitira lehian.

Getxotarrak egoera larrian badira, Oviedokoak ez daude askoz lasaia, soilik puntu bat gehiago dutela. Hala ere, asturiarrek 30-34 irabazi zioten Universidad de Sevillari, igandean eta Getxok galdu egin zuen 27-30 El Monteren kontra. Horrez gain, jaisteko arriskuan dauden beste lau taldeek ere elkarren arteko dema izango dute: Montjuic-Liceo Frances (gaur) eta Valencia-Universidad de Sevilla. Hori gutxi balitz bezala, azken jardunaldian Montjuic-Univ. de Sevilla eta Valencia-Oviedo jokatuko dira.

Beraz, bakoitzak bere kontuak atera beharko ditu, baina bistan da ezin izango duela azken jardunaldiaren zain egon, eta 21. jardunaldi honetan atera beharko dituela kontuak.



MONIKA DEL VALLE

Getxoko Etxebarria eta David Hernandez, El Monteren kontra uztartze bilduan, hirugarren lerroko irteera egiten.

Solano ez da ariko oviedorekin

Denboraldiaren hasieran Aitor Etxebarria, Oscar Solano eta Mikel Rodriguez getxotarrak fitxatu zituen. Rodriguezek eta Solanok taldea utzi egin zuten orain dela aste batzuk, eta Etxebarriak jarraitzen du. Plentziarra ligako zazpigarren tantogilerik onena da. Solanoz gain, aurrean Martinez eta Fuentes ez dira ariko Oviedon; baja garrantzitsuak.

Getxon, aldiz, Azkargorta

eta De Lazaro jokatzeko moduan dira. Partidari dagokionez, Jose Luis Martinez Karra entrenatzaileak dio: «Gure kontrario nagusia urduritasuna eta gehiegizko ardura izan daitezke. Horregatik, lasai jokatzeko ezinbestekoa izango da. Zigor kolpe inozoak ekidin behar ditugu, eta gure zelaitik at jokatu eskura, batez ere derentsan».

Joanekoan Oviedo gailendu zen 29-18. Erasoan zerbait hobeto ari bada Getxo, defentsan Oviedori baino 150 tanto gehiago egin dizkiote.

Azken Sailkapena

	Pt.	I	B	G
1. Quesos E.	35	17	1	2
2. El Monte	31	15	1	4
3. Santboiana	30	15	0	5
4. Canoe	26	13	0	7
5. Dulciora	22	11	0	9
6. Generalife	19	9	1	10
7. Liceo F.	16	8	0	12
8. Oviedo	13	6	1	13
9. U. de Sevilla	12	6	0	14
10. Valencia	12	5	2	13
11. Montjuic	12	6	0	14
12. Getxo Arteak	12	6	0	14

Aratz Gallastegi. GETXOKO JOKALARIA.

«Atzean ez dira onak; han irabazi behar diegu»

AZKEN bi partidetan atzeko jokalaririk izan da Aratz Gallastegi, eta uztartze erdia Javi Diaz. Aratz ez da gustura ari atzeko postuan, baina prest egon beharko du azken txanpa gogor honi heltzeko. Bere esanetan, taldea motibaturik dago.

■ Bitxia da Aratz atzean ikustea; zer gertatu da?

Zehazki ez dakit zergatik izan den, baina uste dut Karrak nahiago duela Javichinek jokatzeko. Nolanahi ere, uste dut arazoa ez dela soilik uztartze erdiarena, aurrelariena ere badela, eta

horretaz javichin ere hasia da ohartzen. Gehiago jokatzen saiatu naiz, baina haiek ez badute aurrera egiten, zuk baloiak zabaltzeari ekin behar diozu. Partida gehienetan mugatuta sentitu naiz horregatik. Bestetik, atzean ez naiz moldatzen, kokapena falta zaidalako eta korrikaldi motzekoa naizelako.

■ Zer sentitzen da azken postuan egotean.

Beste gauza batzuk ikusten dira. Tentsioa areagotu egin da, eta zure eguneroko bizitzan ari zarela, gogora etortzen zaizu egoera. Nola-

nahi ere, denetarik probatu behar da, esperientzia ere hartu behar baita.

■ Joaneko partida duzue errefentzi; zertan aldatuko da?

Aurrean ongi moldatzen dira, baina ez Quesos batean parean. Atzean ez dira onak, eta horregatik, atzean oinarritzkoa egiten badugu menderatuko ditugu. Aurrean nahastu eta lekutik atera behar ditugu. arinago jokatuta. Uztartze irekiak eragin eta sarrera gogorak egin baloia zabaltzeko; alegia, baloiari erritmoa eman. Hori



MONIKA DEL VALLE

ere kosta izan zaigu aurrean; baloiak erraz erori zaizkigu. Nabari zaie esperientzia eta automatismoa falta dutla.

dropak

Hernanik gaur lor dezake Lehen Mailara igotzea

Hernani (Gipuzkoa) Espainiako Lehen Mailara igotzeko Bigarren kanporaketa ari da jokatzeko Zaragozako Fenix taldearen kontra. Joaneko partidaren 55-0 irabazita, gaur oker larria gertatu beharko luke La Isla zelaian (16:00), gipuzkoarrek gora ez egiteko. Aspalduko ametsa dute hernaniarrek maila horretara igotzea, eta zaila izango da aukera galtzea. Gogoratu behar da Euskal Ligako txapeldunak izan zirela.

Tolosa-Bourgoin eta Montferrand-Grenoble, Frantziar

Gaur jokatuko dira Frantziako finalerdia. Partidarik sutsuena Tolosak eta Bourgoinek jokatu dute, Montpellierren (16:45, Fr 2). Tolosak Stade txapeladuna kanporatu zuen (51-19), eta Bourgoinek Begles utzi zuen bazterrean (14-8). Beste finalerdian, Montferrand eta Grenoble ariko dira, Lyon (C+ fr., 14:15). Montferrand taldeak Castres kanporatu zuen (36-31), eta sasoi amaiera ona egin du. Grenoblek ezustean menderatu zuen Colomiers (28-26).

Canterburyk finalerako txartela du jokoan

Hego Hemisferioko Super 12 Txapelketako finalerdia ere gaur jokatu da. Zeelanda Berriko Canterbury da txapeladuna, eta gaur Australiako Queenslanden kontra ariko da Brisbanen (Australia). Queenslandek lehen postuan amaitu zuen. Beste finalerdian, Hego Afrikako Western Stormers eta Zeelanda Berriko Otako ariko dira lehian.

Salva Mujikari omenaldia

Donostiako Kultur eta Turismo Ekintzetxeak Salva Mujikari omenaldia egingo dio maiatzaren 29an, bere gizaki alde on eta kirolean egin duen lan nabarmenagatik. Mujika, Donostiako Athletiko taldeko jokalaririk eta entrenatzaileak, Euskadiko hautatzaileak, eta beste hainbat gauza izana da. Egun ere lanean dihardu.